

N I A V O Ĉ O

Madrida Esperanto-Liceo

San Alejandro 6-4°B-Ext. 28005 Madrid

(Nur poŝta adreso)

Ni kunvenas lunde je la 18,30 en Rodríguez San Pedro 13-3ŝ-7

Redaktas kaj eraras: Lupe Sanz

JULIO – AŬGUSTO 2005

64-a HISPANA KONGRESO EN ALCALÁ DE HENARES

7-a ĝis la 10-a de julio

Vidu kompletan programon en aparta folio

Pli da informoj pri la kongreso ĉe: <http://www.esperanto-es.net/congreso2005/>

Ekde la ĵaŭdo 7-a ĝis la dimanĉo 10-a de julio okazos en Alcalá de Henares la 64a Hispana Kongreso de Esperanto. La kongresejo: Servicio Municipal de Archivo y Biblioteca (Plaza de San Julián, 1) estas tre centra loko, proksime de "Plaza de Cervantes" kaj de la trajn-kaj bus-stacioj. La kongresejo, escepte, estos fermita ĵaŭde vespere, sed okazos programero en la Domo de Cervantes.

Unu el la plej allogaj programeroj estos la astronomia sesio kiu okazos nokte en la kamparo. La Organizo de la Kongreso luis aŭtobuson ekde kaj ĝis Alcalá de Henares por transporti la partoprenantojn senpage. Eventuale tiu aŭtobuso transportos ĝis Madrido tiujn, kiuj ne tranoktos en Alcalá, kvankam estas regula dumnokta aŭtobusa servo Alcalá-Madrido.

La kotizo por gelearnantoj (homoj kiuj dum tiu ĉi lernoĵaro, ekde septembro 2004, lernas la lingvon en iu ajn kurso, ĉu ĉeesta ĉu virtuala) estas 10 eŭroj. Por tion pruví, necesas atestilo de la instruisto aŭ de la zorganto de la virtuala kurso. Tio donas rajton al la partopreno en ĉiuj aktivajoj de la kongreso, sed ne al la ricevo de la materialo kiun oni donacos al la plenrajtaj kongresanoj.

La partoprenantoj de la Alcalá-kongreso ĝuos la eblon partopreni voĉe en filmeto registrata nun en Madrido. Ĝia titolo estas "Hejmo" kaj ĝi estas ludata plene en esperanto. La ludoj de la ĉefroluloj jam estis filmitaj, sed restas ankoraŭ registrenda amasa laŭtlegado de poemo, ĥorece, kvazaŭ litanie. Tiu registrado okazos dum la kongreso de Alcalá far esperantistaj volontuloj; ankoraŭ ne estas certa la ĝusta tago kaj momento kiam registrado realiĝos.

4-a CENTJARIĜO DE "EL QUIJOTE"

La ĵaŭdo 7-a de julio je la 17,00 en la Casa-Museo de Cervantes (Alcalá de Henares) la esperanta versio de Don Kiĥoto, tradukita de Fernando de Diego, estos ricevita en la Domo de Cervantes fare de Director General de Archivos y Bibliotecas.

Dum la Kongreso en Alcalá de Henares okazos ekspozicio kun la desegnoj senditaj de diversaj landoj kaj faritaj de infanoj kaj junuloj kiel kontribuoj ricevitaj por la infana desegno-konkurso "Tia mi vidas Donkiĥoton". Eblas vidi kelkajn desegnojn en la retpaĝo www.esperanto-es.net/quijote/

HISPANIO

Miguel Fernández prezentis en Ateneo de Madrid la du lastajn poemojn de Jorge Camacho: "Saturno" kaj "Celakantoj". La aŭtoro legis kelkajn poemojn kaj respondis al diversaj demandoj de la ĉeestantoj.

Meze de junio okazis en Guadalajara la Maratón de Cuentos kie unu jaro pli estis reprezentita esperanto. La madridaj esperantistoj aranĝis budon por montri esperantajn librojn por infanoj kaj junuloj. La oficiala programo inkludis kurseton "Enkonduko al esperanto" gvidita de Juan del Castillo. La kurso aperis en la titoloj de la ĵurnalo "Nueva Alcarria". Ankaŭ Juan "aktoris" rakontante en esperanto la rakonton "La milito de la ĉapelitaj literoj" kiun unue resumis en la hispana.

LA HOMO KIU DEFIIS BABELON

La biografio de Zamenhof, originale verkita en la franca de Henri Masson kaj René Centassi, tradukita al esperanto en 2001, kaj aktuale tradukata al la korea kaj litova jam estas en la hispana. La libro, tradukita de teamo de Madrida Esperanto-Liceo aperos meze de julio, do, ĝi ne estos disponebla dum la Kongreso: oni disvendos ĝin post la somero.

NOVA LIBRO

"El hombre que desafi6 a Babel"

Hispana versio de la biografio de Zamenhof verkita de Masson/Centassi tradukita far membroj de Madrida Esperanto-Liceo. La prezo de la libro estas 20 eŭroj sed por vendoj ĜIS KAJ DUM la HEF-Kongreso, Madrida Esperanto-Liceo havas grandan oferton:

po 23 eŭroj vi ricevos "El hombre que desafi6 a Babel" kaj "Nuevo M6todo de Esperanto"; la prezo inkludas sendokoston al Hispanio.

Antaŭpago necese al la konto je la nomo de Madrida Esperanto Liceo ĉe Banco Sabadell/Atl6ntico numero 0081/71110/98/0001266730

Oficiala partopreno en Eŭropa konferenco

Laŭ komisiono de KCE prof. Giorgio Silfer partoprenis kiel oficiala delegito en kategorio "observanto" en la internacia konferenco pri lingvotestado, kiun organizis en Berlino 19-21 majo 2005 la asocio deputita fare de la Konsilio de Eŭropo. La pasintan novembron la sama asocio akceptis ke KCE reprezentas esperanton, same kiel Goethe Institut la germanan, Alliance Franaise la francan ktp por la tuta Eŭropo. La konferenco (dua, post 2001 en Barcelono) estis altnivela. Intervenis precipe funkciuloj de ministerioj, tamen kun filologia preparo. Prof. Silfer diskrete rilatadis al diversaj, ĉefe al franclingvanoj (kiel Esperanta Civitano, li havas la devon uzi la francan kiel diplomatan lingvon, se ne eblas esperanto); nenie li trafis negativan sintenon: ĉiuj estis interesataj pri esperanto kaj trovis tion normala.

Faka komisiono ĉe KCE estas nun ellaboranta la adekvatan testaron kaj la oportunajn rimedojn por lingvoekzamenado, ankaŭ telematika. La unuaj rezultoj de ĉi tiu laboro estos prezentitaj al la partoprenantoj en la Esperantologia Fakultato de KCE (2-14 aŭgusto 2005).

NIA LITERATURO EN LA FOKUSO DE LA PEN-MONDKONGRESO

Neniam la esperanto-literaturo ricevis tiel grandan atenton dum la ĉiujara verkista mondkongreso, ĉi-foje en Bledo (Slovenio) 14-21 junio 2005. Unuafoje du esperanto-verkistoj estis oficiale invititaj prelegi: la Prezidanto kaj Vicprezidanto de la Esperanta PEN. Aparte sukcesa estis la prelego de prof. Silfer, kiun aŭskultis gekolegoj el deko da PEN-centroj, interalie la franca, galega, germanlingva eksterlande, hungara, itala, kroata, slovena kaj svisitala. Tre granda estis la intereso en la Virin-Komisiono, kie oni laŭdis la kontribuon de niaj verkistinoj al la realigo de la nova, admirata revuo en esperanto "Femina".

La intereso konkretiĝis en la anonco pri invito al PEN Internacia mondkongresi en Ĉaŭdefono, en 2009. Dum tiu kongreso, organizota de niaj verkistoj, esperanto estos oficiala laborlingvo. La kongreso nature donos la okazon prezenti nian literaturon ankaŭ per teatro kaj per ekspozicio.

ĜIS ALCALÁ DE HENARES!!!

ESPERANTO LICEO DE MADRID

Asociaci6n de Utilidad Pŭblica Municipal
San Alejandro 6- 4^oB EXT
28005 Madrid